

摘藻堂四庫全書薈要

史部

欽定四庫全書薈要

史部
通志卷一百十一上



詳校官員外郎
臣楊世

欽定四庫全書蒼苔要卷九千二十一

史部

通志卷一百一十一上

宋 右 廸 功 郎 鄭 樵 漁 仲 撰

樂 列 傳 第 二 十 四 上

後漢

杜 根

成 翊 世

藥 巴

劉 陶

李 雲

劉 瑜

尹 勳 謝 弼

虞 詡

傅 燮

盖 勳

臧 洪

陳 容

張 衡

馬 融

蔡

邕 左 雄

周 舉

子 懿

黃 瓊

孫 琬

荀 淑

子 爽

韓 韶

鍾

皓

陳寔

子紀

杜根字伯堅潁川定陵人也父安字伯夷少有志節年十三入太學號竒童京師貴戚慕其名或遺之書安不發悉壁藏之及後捕案貴戚賓客安開壁出書印封如故竟不離其患時人貴之位至巴郡太守政甚有聲根性方實好絞直永初元年舉孝廉為郎中時和熹鄧后臨朝權在外戚根以安帝年長宜親政事乃與同時郎上書直諫太后大怒收執根等令盛以縑囊於殿上撲

殺之執法者以根知名私語行事人使不加力既而載
出城外根得蘇太后使人檢視根遂詐死三日日中生
蛆因得逃竄為宜城山中酒家保積十五年酒家知其
賢厚敬待之及鄧氏誅左右皆言根等之忠帝謂根已
死乃下詔布告天下錄其子孫根方歸鄉里徵詣公車
拜侍御史初平原郡吏成翊世亦諫太后歸政挫抵罪
與根俱徵擢為尚書郎並見納用或問根曰往者遇禍
天下同義知故不少何至自苦如此根曰周旋人間非

絕跡之處邂逅發露禍及知親故不為也順帝時稍遷
濟陰太守去官還家年七十八卒翊世字季明少好學
深明道術延光中中常侍樊豐帝乳母王聖共譖皇太
子廢為濟陰王翊世連上書訟之又言樊豐王聖誣罔
之狀帝既不從而豐等陷以重罪下獄當死有詔免官
歸本郡及濟陰王立是為順帝司空張皓辟之皓以翊
世前訟太子之廢薦為議郎翊世自以其功不顯恥於
受位自劾歸三公比辟不應尚書僕射虞詡雅重之欲

引與共參朝政乃上書薦之徵拜議郎後尚書令左雄
僕射郭虔復舉為尚書在朝正色百僚敬之

藥巴字叔元魏郡內黃人也好道順帝時以宦者給事
掖庭補黃門令非其好也性質直學覽經典雖在中官
不與諸常侍交接後陽氣通暢白上乞退擢拜郎中四
遷桂陽太守以郡處南垂不嫻典訓為吏民定婚姻喪
紀之禮立學校以獎進之雖幹吏卑末皆課令習讀程
試殿最隨能升授政事明察視事七年以病乞骸骨荆

州刺史李固薦巴治迹徵拜議郎守光祿大夫與杜喬周舉等八人徇行州郡巴使徐州還再遷豫章太守郡土多山川鬼怪小民常破貲產以祈禱巴素有道術能役鬼神乃悉毀壞房祀翦理姦巫於是妖異自消百姓始頗為懼終皆安之遷沛相所在有績徵拜尚書會帝崩營起憲陵陵左右有小民墳冢主者欲有所侵毀巴連上書苦諫時梁太后臨朝詔詰巴曰大行皇帝晏駕有日卜擇陵園務從省約塋域所極裁二十頃而巴虛

言王者壞人家墓事既非實寢不報下巴猶固遂其愚
復上誹謗苟肆狂瞽益不可長巴坐下獄抵罪禁錮還
家一十餘年靈帝即位大將軍竇武太傅陳蕃輔政徵
拜議郎蕃武被誅巴以其黨復謫為永昌太守以功自
劾辭病不行上書極諫理陳竇之寃帝怒下詔切責收
付廷尉巴自殺子賀官至雲中太守

劉陶字子奇一名偉潁川潁陰人濟北貞王勃之後陶
為人居間不修小節所與交友必也同志好尚或殊富

貴不求合情趣苟同貧賤不易意同宗劉愷以雅德知名獨深器陶時大將軍梁冀專朝而桓帝無子連歲荒饑災異數見陶時遊太學乃上疏陳事曰臣聞人非天地無以為生天地非人無以為靈是故帝非人不立人非帝不寧天之與帝帝之與人猶頭之與足相須而行也伏惟陛下中天稱號襲常存之慶日不視鳴條之事耳不聞檀車之聲天災不有痛於肌膚震食不即損於聖體故蔑三光之謬輕上天之怒伏念高祖起自布衣

合散扶傷克成帝業功亦勤矣流福遺祚至於陛下而
陛下忽高祖之勤妄假利器委授國柄使羣醜刑隸芟
刈小民彫弊諸夏虐流遠近故天降衆異以戒陛下陛
下不悟而競令虎豹窟於麀場豺狼乳於春囿斯豈唐
咨禹稷益典朕虞議物賦土蒸民之意哉又令牧守長
吏上下交競封豕長蛇蠶食天下貨殖者為窮寃之魂
貧餒者作饑寒之鬼高門獲東觀之幸豐室罹妖叛之
罪死者悲於寃寃生者戚於朝野是愚臣所為咨嗟長

懷歎息者也且秦之將亡正諫者誅諛進者賞嘉言結
於忠舌國命出於讒口擅閭樂於咸陽授趙高以車府
權去已而不知威離身而不顧古今一揆成敗同軌願
陛下遠覽彊秦之傾近察哀平之變得失昭然禍福可
見臣又聞危非仁不扶亂非智不救故武丁得傳說以
消鼎雉之災周宣用申甫以濟夷厲之荒竊見故冀州
刺史南陽朱穆前烏桓校尉臣同郡李膺皆履正清平
貞高絕俗穆前在冀州奉憲操平摧破姦黨掃清萬里

膺歷典牧守正身率下及掌戎馬威揚朔北斯實中興
之良佐國家之柱臣也宜還本朝挾輔王室上齊七曜
下鎮萬國臣敢吐不時之議於諱言之朝猶冰霜見日
必至消滅臣始悲天下之可悲今天下亦悲臣之愚惑
也書奏不省時有上書言人以貨輕錢薄故致貧困宜
改鑄大錢事下四府羣僚及太學能言之事陶上議曰
聖王承天制物與人行止建功則衆悅其事興戎而師
樂其旅是故靈臺有子來之人武旅有鳧藻之士皆舉

合時宜動順人道也臣伏讀鑄錢之詔平輕重之議訪
覃幽微不遺窮賤是以藿食之人謬延逮及蓋以為當
今之憂不在於貨在乎民饑夫生養之道先食後民是
以先王觀象育物敬授民時使男不逋畝女不下機故
君臣之道行王路之教通由是言之食者乃有國之所
寶生民之至貴也竊見比年以來良田盡於蝗螟之口
杼柚空於公私之求所急朝夕之餐所患靡盬之事豈
謂錢貨之厚薄銖兩之輕重哉就使當今沙礫化為南

金瓦石變為和玉使百姓渴無所飲饑無所食雖皇義
之純德唐虞之文明猶不能保蕭牆之內也蓋民可百
年無貨不可一朝有饑故食為至急也議者不達農殖
之本多言鑄冶之便或欲因緣行詐以賈國利國利將
盡取者爭競造鑄之端於是乎生蓋萬人鑄之一人奪
之猶不能給況一人鑄之則萬人奪之乎雖陰陽為炭
萬物為銅役不食之民使不饑之士猶不能足無厭之
求也夫欲民殷財阜要在止役禁奪則百姓不勞而足

陛下聖德愍海內之憂戚傷天下之艱難欲鑄錢齊貨以救其弊此猶養魚沸鼎之中棲鳥烈火之上水木本魚鳥之所生也用之不時必至焦爛願陛下寬鍤薄之禁後鑄治之議聽民庶之謠吟問路叟之所憂瞰三光之文曜視山河之分流天下之心國家大事粲然可見無有遺惑者矣臣嘗誦詩至於鴻鴈于野之勞哀勤百堵之事每喟然長懷中篇而歎近聽征夫饑勞之聲甚於斯歌是以追悟匹夫吟魯之憂始於此乎見白駒之

意屏營傍徨不能監寐伏念當今地廣而不得耕民衆
而無所食羣小競起秉國之位鷹揚天下烏鈔求飽吞
肌及骨並噬無厭誠恐卒有役夫窮匠起於板築之間
投斤攘臂登高遠呼使愁怨之民響應雲合八方分崩
中夏魚潰雖方尺之錢何能有救其危猶舉函牛之鼎
絳織枯之木詩人所以眷然顧之潛焉出涕者也臣東
野狂闇不達大義緣廣及之時對過所問知必以身脂
鼎鑊為天下笑帝竟不鑄錢後陶舉孝廉除順陽長縣

多姦猾陶到官宣募吏民有氣力猛勇能以死易生者不拘亡命姦賊於是剽輕劔客之徒過晏等十餘人皆來應募陶責其先過要以後効使各結所厚少年得數百人皆嚴兵待命於是覆案姦軌所發若神以病免吏民思而歌之曰邑然不樂思我劉君何時復來安此下民陶明尚書春秋為之訓詁推三家尚書及古文是正文字七百餘事名曰中文尚書頃之拜侍御史靈帝宿聞其名數引納之時鉅鹿張角偽託大道妖惑小民陶

與奉車都尉樂松議郎袁貢連名上疏言之曰聖王以天下耳目為視聽故能無不聞見今張角支黨不可勝計前司徒楊賜奏下詔書切勅州郡護送流民會賜去位不復捕錄雖會赦令而謀不解散四方私言云角等竊入京師覘視朝政烏聲獸心私共嗚呼州郡忌諱不欲聞之但更相告語莫敢公文宜下明詔重募角等賞以國土有敢回避與之同罪帝殊不悟方詔陶次第春秋條例明年張角反亂海內鼎沸帝思陶言封中陵鄉

侯三遷尚書令以所舉將為尚書難為齊列乞從冗散
拜侍中以數切諫為權臣所憚徙為京兆尹到職當出
修宮錢直千萬陶既清平而恥以錢買職稱疾不聽政
帝宿重陶才原其罪徵拜諫議大夫是時天下日危寇
賊方熾陶憂亂復上疏曰臣聞事之急者不能安言心
之痛者不能緩聲竊見天下前遇張角之亂後遭邊章
之寇每聞羽書告急之聲心灼內熱四體驚悚今西羗
逆類多私署將帥皆多段熲時吏曉習戰陳識知山川

變詐萬端臣常懼其輕出河東馮翊鈔西軍之後東之
函谷據院高望今果已攻河東恐遂轉更豕突上京如
是則南道斷絕車騎之軍孤立關東破膽四方動搖威
之不來叫之不應雖有田單陳平之策計無所用臣前
驛馬上便宜急絕諸郡賦調冀尚可安事付主者留連
至今莫肯求問今上郡之民皆以奔亡南出武關北徙
壺谷冰駭風散唯恐在後今其存者尚十三四軍吏士
民悲愁相守民有百走退死之心而無一前鬪生之計

西寇浸前去營咫尺胡騎分布已至諸陵將軍張溫天性精勇而主者旦夕迫促軍無後殿假令失利其敗不救臣自知言數見厭而言不自裁者以為國安則臣蒙其慶國危則臣亦先亡也謹復陳當今要急八事乞須臾之間深垂省納其八事大較言天下大亂皆由宦官宦官事急共讒陶曰前張角事發詔書示以威恩自此以來各各改悔今者四方安靜而陶疾害聖政專言妖孽州郡不上陶何由知疑陶與賊通情於是收陶下黃

門北寺獄掠治日急陶自知必死對使者曰朝廷前封
臣云何今反受邪譖恨不與伊呂同時而以三仁為輩
遂閉氣而死天下莫不痛之陶著書數十萬言又作七
曜論匡老子反韓非復孟軻又上書言當世便事條教
賦奏書記疑辯凡百餘篇時司徒陳耽亦以非罪與陶
俱繫耽以忠正稱歷位三司光和五年詔公卿採謚言
舉刺史二千石為民蠹害者時太尉許馡司空張濟承
望內官受取貨賂其宦官子弟賓客雖貪汙穢濁皆不

敢問而虛紕邊遠小郡清修有惠化者二十六人吏人詣闕陳訴耽與議郎曹操上言公卿所舉率黨其私所謂放鷓臬而囚鸞鳳其言忠切帝以讓穢濟由是諸坐謚言徵者悉拜議郎宦官怨之遂誣陷耽死獄中

李雲字行祖甘陵人也性好學善陰陽初舉孝廉再遷白馬令桓帝延熹二年誅大將軍梁冀而中常侍單超等五人皆以誅梁冀功並封列侯專權選舉又立掖庭民女亳氏為皇后數月間后家封者四人賞賜巨萬是

時地數震裂衆災頻降雲素剛直憂國將危心不能忍
乃露布上書移副三府曰臣聞皇后天下母德配坤靈
得其人則五氏來備不得其人地動搖宮比年災異可
謂多矣皇天之戒可謂至矣高祖受命至今三百六十
四歲君期一周當有黃精代是姓陳項虞田許氏不可
令此人居太尉太傅典兵之官舉厝至重不可不慎班
功行賞宜應其實梁冀雖持權專擅虐流天下今以罪
行誅猶召家臣搃殺之耳而猥封謀臣萬戶以上高祖

聞之得無見非西北列將得無解體孔子曰帝者諦也
今官位錯亂小人諂進財貨公行政化日損尺一拜用
不經御省是帝欲不諦乎帝得奏震怒下有司逮雲詔
尚書都護劔戟送黃門北寺獄使中常侍管霸與御史
廷尉雜考之時弘農五官掾杜衆傷雲以忠諫獲罪上
書願與雲同日死帝愈怒遂并下廷尉大鴻臚陳蕃上
疏救雲曰李雲所言雖不識禁忌干上逆旨其意歸於
忠國而已昔高祖忍周昌不諱之諫成帝赦朱雲腰領

之誅今日殺雲臣恐剖心之譏復議於世矣故敢觸龍
鱗冒昧以請太常楊秉洛陽市長沐茂郎中上官資並
上疏請雲帝恚甚有司奏以為大不敬詔切責蕃秉免
歸田里茂資貶秩二等時帝在濯龍池管霸奏雲等事
霸跪言曰李雲野澤愚民杜衆郡中小吏出於狂慙不
足加罪帝謂霸曰帝欲不諱是何等語而常侍欲原之
邪顧使小黃門可其奏雲衆皆死獄中後冀州刺史賈
琮使行部過祠雲墓刻石表之

劉瑜字季節廣陵人也高祖父廣陵靖王父辯清河太守瑜少好經學尤善圖讖天文歷算之術州郡禮請不就延熹八年太尉楊秉舉賢良方正及到京師上書陳事曰臣瑜自念東國鄙陋得以豐沛枝允被蒙復除不給卒伍故太尉楊秉知臣竊闕典籍猥見顯舉誠冀臣愚直有補萬一而秉忠謨不遂命先朝露臣在下土聽聞歌謠驕臣虐政之事遠近呼嗟之音竊為辛楚泣血連如幸得引錄備答聖問泄寫至情不敢庸回誠願陛

下且以須臾之慮覽今往之事人何為咨嗟天曷為變
動蓋諸侯之位上法四七垂文炳耀闕之盛衰者也今
中官邪孽比肩裂土皆競立盾嗣繼體傳爵或乞子疎
屬或買兒市道殆垂開國承家之義古者天子一娶九
女娣姪有序河圖授嗣正在九房今女嬖令色充積閨
帷皆當盛其玩飾冗食空宮勞散精神生長六疾此國
之費也生之傷也且天地之性陰陽正紀隔絕其道則
水旱為并詩云五日為期六日不詹怨曠作歌仲尼所

錄況從幼至長幽藏歿身又常侍黃門亦廣妻娶怨毒
之氣結成妖昔行路之言官發畧人女取而復置轉相
驚懼孰不悉然無緣空生此謗鄒衍匹夫杞氏匹婦尚
有城崩霜隕之異況乃羣輩咨怨能無感乎昔秦作阿
房國多刑人今第舍增多窮極竒巧掘山攻石不避時
令促以嚴刑威以正法民無罪而覆入之民有田而覆
奪之州郡官府各自考事姦情賕賂皆為吏餌民愁鬱
結起入賊黨官輒興兵誅討其罪貧困之民或有賣其

首級以要酬賞父兄相代殘身妻孥相視分裂窮之如
彼伐之如此豈不痛哉又陛下以北辰之尊神器之寶
而微行近習之家私幸宦官之舍賓客市買熏灼道路
因此暴縱無所不容今三公在位皆博達道藝而各正
諸已莫或匡益者非不智也畏死罰也惟陛下設置七
臣以廣諫道及開東序金縢史官之書從堯舜禹湯文
武致興之道遠佞邪之人放鄭衛之聲則正致和平德
感祥風矣臣慙慙推情言不足採懼以觸忤征營惛悖

於是特詔召瑜問災咎之徵指事案經識以對執政者
欲令瑜依違其辭而更策以他事瑜復悉心以對八千
餘言有切於前帝竟不能用拜為議郎及帝崩大將軍
竇武欲大誅宦官乃引瑜為侍中又以侍中尹勲為尚
書令共同謀畫及武敗瑜勲並被誅事在武傳勲字伯
元河南人從祖睦為太尉睦孫頌為司徒勲為人剛毅
直方少時每讀書得忠臣義士之事未嘗不投書而仰
歎自以行不合於當時不應州郡公府禮命桓帝時以

有道徵四遷尚書令延熹中誅大將軍梁冀帝召勲部
分衆職甚有方畧封宜陽鄉侯僕射霍諝尚書張敬歐
陽參李偉虞放周永並封亭侯勲後再遷至九卿以病
免拜為侍中八年中常侍具瑗左悺等有罪免奪封邑
因黜勲等爵瑜誅後宦官悉焚其上書以為訛言子琬
傳瑜學明占候能著災異舉方正不行

謝弼字輔宣東郡武陽人也中直方正為鄉邑所宗師
建寧二年詔舉有道之士弼與東海陳敦元菟公孫度

俱對策皆除郎中時青蛇見前殿大風拔木詔公卿以
下陳得失弼上封事曰臣聞和氣應於有德災異生乎
失政上天告譴則王者思其愆政道或虧則姦臣當其
罰夫蛇者陰氣所生鱗者甲兵之符也鴻範傳曰厥極
弱時則有蛇龍之孽又熒惑守亢裴回不去有近臣謀
亂發於左右不知陛下所與從容帷幄之內親信者為
誰宜急斥黜以消天成臣又聞惟虺惟蛇女子之祥伏
惟皇太后定策宮闈援立聖明書云父子兄弟罪不相

及竇氏之誅豈宜咎延太后幽隔空宮愁感天心如有
霧露之疾陛下當何面目以見天下昔周襄王不能敬
事其母戎狄遂至交侵孝和皇帝不絕竇氏之恩前世
以為美談禮為人後者為之子今以桓帝為父豈得不
以太后為母哉援神契曰天子行孝四夷和平方今邊
境日蹙兵革蜂起自非孝道何以濟之願陛下仰慕有
虞蒸蒸之孝俯思凱風慰母之念臣又聞爵賞之設必
酬庸勲開國承家小人勿用今功臣久外未蒙爵秩阿

母寵私乃享大封大風雨電亦由於茲又故太傅陳蕃
輔相陛下勤身王室夙夜匪懈而見陷羣邪一旦誅滅
其為酷濫駭動天下而門生故吏並離徙錮蕃身已往
人百何贖宜還其家屬解除禁錮夫台宰重器國命所
繼今之四公唯司空劉寵斷斷首善餘皆素餐致寇之
人必有折足覆餗之凶可因災異並加罷黜徵故司空
王暢長樂少府李膺並居政事庶災變可消國祚惟永
臣山藪頑闇未達國典策曰無有所隱敢不盡愚用忘

諱忌伏惟陛下裁其誅罰左右惡其言出為廣陵府丞
去官歸家中常侍曹節從子紹為東郡太守忿疾於弼
遂以他罪收考掠案死獄中時人悼傷焉初平二年司
隸校尉趙謙上書訟弼忠節求報其怨魂乃收紹斬之
虞詡字升卿陳國武平人也祖父經為郡縣獄吏案法
平允務存寬恕每冬月上其狀恒流涕隨之常稱曰東
海于公高為里門而子定國卒至丞相吾治獄六十年
雖不及于公其度幾乎子孫何必不為九卿邪故字曰

升卿詔年十二能通尚書早孤孝養祖母縣舉順孫國相竒之欲以為吏詔辭曰祖母九十非詔不養相乃止後祖母終服闋辟太尉李修府拜郎中永初四年羌胡反亂殘破并涼大將軍鄧騭以軍役方費事不相贍欲棄涼州并力北邊乃會公卿集議騭曰譬若衣敗壞一以相補猶有所完若不如此將兩無所保識者咸同詔聞之乃說李修曰竊聞公卿定策當棄涼州求之愚心未見其便先帝開拓土宇劬勞後定而今憚小費舉而

棄之涼州既棄即以三輔為塞則園陵單外此不可之甚也諺曰關西出將關東出相觀其習兵壯勇實過餘州今羌胡所以不敢入據三輔為腹心之患者以涼州在後故也其土人所以推鋒執銳無反顧之心者為臣屬於漢故也若棄其境域徙其人庶安土重遷必生異志如使英雄相聚席卷而東雖責育為卒太公為將猶恐不及當禦議者喻以補衣猶有所完謂恐其疽食侵淫而無限極棄之非計修曰吾意不及此微子之言幾

敗國事然則計當安出詔曰今涼土擾動人情不安竊
憂卒然有非常之變誠宜令四府九卿各辟彼州數人
其牧守令長子弟皆除為冗官外以勸厲答其功勤內
以拘致防其邪計修善其言更集四府皆從詔議於是
辟西州豪傑為掾屬拜牧守長吏子弟為郎以安慰之
鄧騭兄弟以詔異其議因此不平欲以吏法中傷詔後
朝歌賊寧季等數千人攻殺長吏屯聚連年州郡不能
禁乃以詔為朝歌長故舊皆弔曰得朝歌何衰詔笑曰

志不求易事不避難臣之職也不遇槃根錯節何以別
利器乎始到謁河南太守馬稜稜勉之曰君儒者當謀
謨廟堂反在朝歌邪詡曰初除之日士大夫皆弔勉以
詡籌之知其無能為也朝歌者韓魏之郊背太行臨黃
河去教倉百里而青冀之民流亡萬數賊不知開倉招
衆劫庫兵守城臯斷天下右臂此不足憂也今其衆新
盛難與爭鋒兵不厭權願寬假轡策勿有所拘闔而已
及到官設令三科以募求壯士自掾史以下各舉所知

其攻劫者為上傷人偷盜者次之帶喪服而不事家業為下收得百餘人詗為饗會悉貫其罪使入賊中誘令劫掠乃伏兵以待之遂殺賊數百人又潛遣貧民能縫者傭作賊衣以采綖縫其裾為幟有出市里者吏輒禽之賊由是駭散咸稱神明遷懷令後羌寇武都鄧太后以詗有將帥之畧遷武都太守引見嘉德殿厚加賞賜羌乃率衆數千遮詗於陳倉嶺谷詗即停軍不進而宣言上書請兵須到當發羌聞之乃分鈔傍縣詗因其兵

散日夜進道兼行百餘里令吏士各作兩竈日增倍之
羌不敢逼或問曰孫臏減竈而君增之兵法日行不過
三十里以戒不虞而今日行且二百餘里何也詎曰虜
衆多吾兵少徐行則易為所及速進則彼不測虜見竈
日增必謂郡兵來迎衆多行速必憚追我孫臏見弱吾
今示彊勢有不同故也既到郡兵不滿三千而羌衆萬
餘攻圍赤亭數十日詎乃令軍中使彊弩勿發而潛發
小弩羌以為矢力弱不能至并兵急攻詎於是使二十

疆弩共射一人發無不中羌大震退詗因出城奮擊多
所傷殺明日悉陳其衆令從東郭門出北郭門入貿易
衣服迴轉數周羌不知其數更相恐動詗計賊當退乃
遣五百人於淺水設伏候其走路虜果大奔因掩擊大
破之斬獲甚衆賊由是敗散南入益州詗乃占相地勢
築營壁二百八十所招還流亡假振貧民郡遂以安先
是運道艱險舟車不通驢馬負載僦五致一詗乃自將
吏士案行川谷自沮至下辯數十里中皆燒石翦木開

漕船道以人僦直雇借傭者於是水運通利歲省四千
餘萬詔始到郡戶裁盈萬及綏聚荒餘招還流散二三
年間遂至增四萬餘戶鹽米豐賤十倍於前坐法免永
建元年代陳禪為司隸校尉數月間奏太傅馮石太尉
劉燾中常侍程璜陳秉孟生李閏等百官側目號為苛
刻三公劾奏詔盛夏多拘繫無辜為吏人患詔上書曰
法禁者俗之隄防刑罰者人之銜轡今州曰任郡郡曰
任縣更相委遠百姓怨窮以苟容為賢盡節為愚臣所

發舉贓罪非一二府恐為臣所奏遂加誣罪臣將從史
魚死即以屍諫耳順帝省其章乃為免司空陶敦時中
常侍張防特用權勢每請託受取詔輒案之而屢寢不
報詔不勝其憤乃自繫廷尉奏言曰昔孝安皇帝任用
樊豐遂交構嫡統幾亡社稷今者張防復弄威柄國家
之禍將重至矣臣不忍與防同朝謹自繫以聞無令臣
襲楊震之迹書奏防涕泣訴帝詔坐論輸左校防必欲
害之二日之中傳考四獄獄吏勸詔自引詔曰寧伏歐

乃以示遠近宦者孫程張賢等知詡以忠獲罪乃相率
奏乞陛見程曰陛下始與臣等造事之時常疾姦臣知
其傾國今者即位而復自為何以非先帝乎司隸校尉
虞詡為陛下盡忠而更被拘繫常侍張防贓罪明正反
構忠良今客星守羽林其占宮中有姦臣宜急救防送
獄以塞天變下詔出詡還假印綬時防立在帝後程乃
叱防曰姦臣張防何不下殿防不得已趨就東廂程曰
陛下急救防無令從阿母求請帝問諸尚書尚書賈朗

素與防善證詗之罪帝疑焉謂程曰且出吾方思之於是詗子顛與門生百餘人舉幡候中常侍高梵車叩頭流血訴言枉狀梵乃入言之防坐徙邊賈朗等六人或徙或黜即日赦出詗程復上書陳詗有大功語甚激切帝感悟復徵拜議郎數日遷尚書僕射是時長吏二千石聽百姓謫罰者輸贖號為義錢託為貧人儲而守令因以聚斂詗上疏曰元年以來貧百姓章言長吏受取百萬以上者匈匈不絕謫罰吏人至數千萬而三公刺

史少所舉奏尋永平章和中州郡以走卒錢給貸貧人
司空劾案州及郡縣皆坐免黜今宜遵前典蠲除權制
於是詔書下詡章切責州郡謫罰輸贖自此而止先是
寧陽主簿詣闕訴其縣令之枉積六七歲不省主簿乃
上書曰臣為陛下子陛下為臣父臣章百上終不見省
臣豈可北詣單于以告怨乎帝大怒持章示尚書尚書
遂劾以大逆詡駁之曰主簿所訟乃君父之怨百上不
達是有司之過愚蠢之人不足多誅帝納詡言答之而

已詗因謂諸尚書曰小民有怨不遠千里斷髮刻肌詣
闕告訴而不為理豈臣下之義君與濁長吏何親而與
怨民何仇乎聞者皆慙詗又上言臺郎顯職任之通階
今或一郡七八或一州無人宜令均平以厭天下之望
及諸奏議多見從用詗好刺舉無所回容數以此忤權
戚遂九見譴考三遭刑罰而剛正之性終老不屈永和
初遷尚書令以公事去官朝廷思其忠復徵之會卒臨
終謂其子恭曰吾事君直道行已無愧所悔者為朝歌

長時殺賊數百人其中何能不有寃者自此二十餘年

家門不增一口斯獲罪於天恭有俊才官至上黨太守

傅燮字南容北地靈州人也本字幼起慕南容之三復

白圭乃易字焉身長八尺有威容少師事太尉劉寬再

舉孝廉聞所舉郡將喪乃棄官行服後為護軍司馬與

左中郎皇甫嵩俱討賊張角燮素疾中官既行因上疏

曰臣聞天下之禍不由於外皆興於內是故虞舜升朝

先除四凶然後用十六相明惡人不去善人無由進也

今張角起於趙魏黃巾亂於六州此皆釁發蕭牆而禍
延四海也臣受戎任奉辭伐罪始到潁川戰無不尅黃
巾雖盛不足為廟堂憂也臣之所懼在於治水不自其
源末流彌增其廣耳陛下仁德寬容多所不忍故閹豎
弄權忠臣不進誠使張角梟夷黃巾變服臣之所憂甫
益深耳何者夫邪正之人不宜共國亦猶冰炭不可同
器彼知正人之功顯而危亡之兆見皆巧辭飾說共長
虛偽夫孝子疑於屢至市虎成於三夫若不詳察真偽

忠臣將復有杜郵之戮矣陛下宜思虞舜四罪之舉速
行讒佞放殛之誅則善人思進姦凶自息臣聞忠臣之
事君猶孝子之事父也子之事父焉得不盡其情使臣
身備鈇鉞之誅陛下少用其言國之福也書奏宦者趙
忠見而忿惡及破張角變功多當封忠訴譖之靈帝猶
識變言得不加罪竟亦不封以為安定都尉以疾免後
拜議郎會西羌反邊章韓遂作亂隴右徵發天下役賦
無已司徒崔烈以為宜棄涼州詔會公卿百官烈堅執

先議燮厲言曰斬司徒天下乃安尚書郎楊贊奏燮廷辱大臣帝以問燮燮對曰昔昌頓至逆也樊噲為上將願得十萬衆橫行匈奴中憤激思奮未失人臣之節顧計當從與不耳季布猶曰噲可斬矣夫涼州天下要衝國家藩衛高祖初興使酈商別定隴右世宗拓境列置四郡議者以為斷匈奴右臂今牧御失和使一州叛逆海內為之騷動陛下卧不安寢烈為宰相不念為國思所以弭之之策乃欲割棄一方萬里之土臣竊惑之若

使左衽之虜得居此地士勁甲堅因以為亂此天下之
至慮社稷之深憂也若烈不知是極蔽也知而故言是

不忠也帝從燮議由是朝廷重其方格每公卿有缺為
衆議所歸頃之趙忠為車騎將軍詔忠論討黃巾之功
執金吾甄舉等謂忠曰傳南容前在東軍有功不侯故
天下失望今將軍親當重任宜進賢理屈以副衆心忠
納其言遣弟城門校尉延致殷勤延謂燮曰南容少答
我常侍萬戶侯不足得也燮正色拒之曰遇與不遇命

也有功不論時也傅燮豈求私賞哉忠愈懷恨然憚其名不敢害權貴亦多疾之是以不得留出為漢陽太守初郡將范津明知人舉燮孝廉及津為漢陽與燮交代合符而去鄉邦榮之津字文淵南陽人燮善邳人叛羌懷其恩化並來降符乃廣開屯田列置四十餘營時刺史耿鄙委任治中程球球為通姦利士人怨之中平四年鄙率六郡兵討金城賊王國韓遂等燮知耿失衆必敗諫曰使君統政日淺人未知教孔子曰不教人戰是

謂棄之今率不習之人越大隴之阻將十舉十危而賊
聞大軍將至必萬人一心邊兵多勇其鋒難當而新合
之衆上下未和萬一內變雖悔無及不若息軍養德明
賞必罰賊得寬挺必謂我怯羣惡爭勢其離可必然後
率已教之人討成擒之賊其功可坐而待也今不為萬
全之福而就必危之禍竊為使君不取鄙不從行至狄
道果有反者先殺程球次害鄙賊遂圍漢陽城中兵少
糧盡燹猶固守時北胡騎數千隨賊攻郡皆夙懷燹思

共於城外叩頭求送燮歸鄉里子幹年十三從在官舍
知燮性剛有高義恐不能屈志以免進諫曰國家昏亂
遂令大人不容於朝今天下已叛兵不足自守鄉里羌
胡先被恩德欲令棄郡而歸願必許之徐至鄉里率厲
義徒見有道而輔之以濟天下言未終燮慨然而歎呼
幹小字曰別成汝知吾必死邪蓋聖達節次守節且殷
紂之暴伯夷不食周粟而死仲尼稱其賢今朝廷不甚
殷紂吾德亦豈絕伯夷世亂不能養浩然之志食祿又

避其難吾行何之必死於此汝有才智勉之勉之主簿
楊會吾之程嬰也幹咽哽不能復言左右皆泣下王國
使故酒泉太守黃衍說夔曰成敗之事已可知矣先起
上有霸王之業下成伊呂之勲天下非復漢有府君豈
有意為吾屬師乎夔按劍叱衍曰若剖符之臣反為賊
說邪遂麾左右進兵臨陣戰歿諡曰壯節侯幹知名位
至扶風太守

蓋勲字元固敦煌廣至人也家世二千石初舉孝廉為

漢陽長史時武威太守倚恃權勢恣行貪橫從事武都
蘇正和案致其罪涼州刺史梁鵠畏懼貴戚欲殺正和
以免其負乃訪之於勲勲素與正和有仇或勸勲可因
此報隙勲曰不可謀事殺良非忠也乘人之危非仁也
乃諫鵠曰夫紕食鷹鳶欲求其鷙鷙而亨之將何用哉
鵠從其言正和喜於得免而詣勲求謝勲不見曰吾為
梁使君謀不為蘇正和也怨之如初中平元年北地羌
胡與邊章等寇隴右刺史左昌因軍興斷盜數千萬勲

固諫昌怒乃使勲別屯河陽以拒賊鋒欲因軍事罪之而勲數有戰功邊章等遂攻金城殺郡守陳懿勲勸昌救之不從邊章等進圍昌於冀昌懼而召勲勲初與從事辛曾孔常俱屯阿陽及昌檄到曾等疑不肯赴勲怒曰昔莊賈後期穰苴奮劍今之從事豈重於古之監軍哉曾等懼而從之勲即率兵救昌到乃誚讓章等責以背叛之罪皆曰左使君若早從君言以兵臨我度可自改今罪已重不得降也乃解圍而去昌坐斷盜徵以扶

風宋梟代之梟患多寇叛謂勲曰涼州寡於學術故屢致反暴今欲多寫孝經令家家習之庶或使民知義勲諫曰昔太公封齊崔杼殺君伯禽侯魯慶父篡位此二國豈乏學者今不急靜難之術遽為非常之事既足結怨一州又當取笑朝廷勲不知其可也梟不從遂奏行之果被詔書詰責坐以虛慢徵時叛羌圍護羌校尉夏育於畜官勲與州郡合兵救育至孤槃為羌所破勲收餘衆百餘人為魚麗之陳羌精騎夾攻之急士卒多死

勲被三劄堅不動乃指木表曰必屍我於此句就種羌
滇吾素為勲所厚乃以兵扞衆曰蓋長史賢人汝曹殺
之者為負天勲罵曰死反虜汝何知促來殺我衆相視
而驚滇吾下馬與勲勲不肯上遂為賊所執羌戎服其
義勇不敢加害送還漢陽後刺史楊雍即表勲領漢陽
太守時人饑相漁食勲調穀廩之先出家糧以率衆存
活者千餘人後去官徵拜討虜校尉靈帝召見問天下
何苦而反亂如此勲曰倖臣子弟擾之時宦者上軍校

尉蹇碩在坐帝顧問碩碩懼不知所對而以此恨勲帝
又謂勲曰吾已陳師於平樂觀多出中藏財物以餌士
何如勲曰臣聞先王耀德不觀兵今寇在遠而設近陳
不足昭果毅祇黷武耳帝曰善恨見君晚羣臣初無是
言也勲時與宗正劉虞佐軍校尉袁紹同典禁兵勲謂
虞紹曰吾仍見上上甚聰明但擁蔽於左右耳若共併
力誅嬖倖然後徵拔英俊以興漢室功遂身退豈不快
乎虞紹亦素有謀因相連結未及發而司隸校尉張溫

舉勲為京兆以帝方欲延接勲而蹇碩等心憚之並勸
從溫奏遂拜京兆尹時長安令楊黨父為中常侍恃勢
貪放勲案得其贓千餘萬貴戚咸為之請勲不聽具以
事聞并連黨父有詔窮案威震京師時小黃門京兆高
望為尚藥監倖於皇太子太子因蹇碩屬望子進為孝
廉勲不肯用或曰皇太子副主望其所愛碩帝之寵臣
而子違之所謂三怨成府者也勲曰選賢所以報國也
非賢不舉死亦何悔勲雖在外每軍國密事帝常手詔

問之數加賞賜甚見親信在朝臣右及帝崩董卓廢少
帝殺何太后勲與卓書曰昔伊尹霍光權以立功猶可
寒心足下小醜何以終此賀者在門弔者在廬可不慎
哉卓得書意甚憚之徵為議郎時左將軍皇甫嵩精兵
三萬屯扶風勲密相要結將以討卓會嵩亦被徵勲以
衆弱不能獨立遂並還京師自公卿以下莫不卑下於
卓唯勲長揖爭禮見者皆為失色卓問司徒王允曰欲
得快司隸校尉誰可作者允曰唯有蓋京兆耳卓曰此

人明智有餘然不可假以雄職乃以為越騎校尉卓又欲不令久典禁兵復出為潁川太守未及至郡徵還京師時河南尹朱雋為卓陳軍事卓折雋曰我百戰百勝決之於心卿勿妄說且污我刀勲曰昔武丁之明猶求箴諫況如卿者而欲杜人之口乎卓曰戲之耳勲曰不聞怒言可以為戲卓乃謝雋勲雖彊直不屈而內厭於卓不得意疽發背卒時年五十一遺令勿受卓賻贈卓欲外示寬容表賜東園秘器賵襚送之如禮葬於安陵

子順官至永陽太守

臧洪字子源廣陵射陽人也父昊有幹才熹平元年會稽妖賊許昭起兵句章自稱大將軍立其父生為越王攻破城邑衆以萬數拜昊揚州刺史昊率丹陽太守陳夤擊破之昭遂復更屯結昊等進兵連戰三年平之獲昭父子斬首數千級遷昊為使匈奴中郎將洪年十五以父功拜童子郎知名太學洪體貌魁梧有異姿舉孝廉補郎中平棄官還家太守張超請為功曹董卓

弒帝圖危社稷洪說超曰明府歷世受恩兄弟並據大郡今王室將危賊臣未梟此誠天下義烈報恩効命之秋也今郡境尚完吏民殷富若動枹鼓可得二萬人以此誅除國賊為天下倡先義之大者也超然其言與洪西至陳留見兄邈計事邈亦素有心會于酸棗邈謂超曰聞弟為郡守政教恩威不由己出動任臧洪洪者何人超曰洪才畧智數優超甚海內奇士也邈即引見洪與語大異之致之於劉兗州公山孔豫州公緒皆與洪

善乃設壇場方共盟誓諸州郡更相讓莫敢當咸共推
洪洪乃升壇操槃歃血而盟曰漢室不幸皇綱失統賊
臣董卓乘釁縱害禍加至尊虐流百姓大懼淪喪社稷
翦覆四海兗州刺史岱豫州刺史佃陳留太守邈東郡
太守瑁廣陵太守超等糾合義兵並赴國難凡我同盟
齊心戮力以致臣節殞身喪元必無二志有渝此盟俾
墜其命無克遺育皇天后土祖宗明靈實皆鑒之洪辭
氣慷慨涕泣橫下聞其言者雖卒伍廝養莫不激揚人

思致節頃之諸軍莫適先進而食盡衆散超遣洪詣大
司馬劉虞謀值公孫瓚之難至河間遇幽冀州交兵使
命不達而袁紹見洪又竒重之與結友好會青州刺
史焦和卒紹使洪領青州以撫其衆洪在州二年羣盜
奔走紹歎其能徙為東郡太守治東武陽曹操圍張超
於雍丘超言唯恃臧洪當來救我衆人以為袁曹方睦
而洪為紹所表用必不敗好招禍遠來赴此超曰子源
天下義士終不背本但恐見禁制不相及逮耳洪聞之

果徒跣號泣從紹請兵將赴其難紹不與請自率所領以行亦不許雍丘遂潰超被種族洪由是怨紹絕不與通紹興兵圍之歷年不下令洪邑人陳琳以書與洪喻以禍福責以恩義洪答曰隔閤相思發於寤寐相去步武之間耳而以趣舍異規不得相見其為愴恨可為心哉前日不遺比辱雅贖述叙禍福公私切至所以不即奉答者既學薄才鈍不足塞詰亦以吾子攜負側室息肩主人家在東州僕為仇敵以是事人雖披中情墮肝

膽猶身疏有罪言皆見怪方首尾不救何能卹人且以子之才窮該典籍豈將闇於大道不達余趣哉然猶復云云者僕是知足下之言信不由衷將以救禍也必欲算計長短辯語是非是非之論言滿天下陳之更不明不言無所損又言傷告絕之義非吾所忍行也是以捐棄紙筆一無所答亦冀遙忖其心知其計定不復渝變也重獲來命援引古今紛紜六紙雖欲不言焉得已哉僕小人也本因行役特蒙傾蓋恩深分厚遂竊大州寧

樂今日自還接刃乎每登城勒兵望主人之旗鼓感故友之周旋撫弦擲矢不覺流涕之覆面也何者自以輔佐主人無以為悔主人相接過絕等倫當受任之初自謂究竟大事共尊王室豈悟天子不悅本州見侵郡將邁牖里之厄陳留克創兵之謀謀計棲遲喪忠孝之名杖策攜背虧交友之分揆此二者與其不得已喪忠孝之名與虧交友之道輕重殊塗親疏異畫故便收淚告絕若使主人少垂故人住者側席去者克己不汲汲於

離友信刑罰以自輔則僕抗季札之志不為今日之戰
矣何以效之昔張景明親登壇歃血奉辭奔走卒使韓
牧讓印主人得地然後但以拜章朝主賜爵獲傳之故
旋時之間不蒙觀過之貸而受夷滅之禍呂奉先討卓
來奔請兵不獲告去何罪復見斫刺濱于死亡劉子璜
奉使踰時辭不獲命畏威懷親以詐求歸可謂有志忠
孝無損霸道者也然輒僵斃麾下不蒙虧除僕雖不敏
原始見終觀微知著竊度主人之心豈謂三子宜死罰

當刑中哉實欲一統山東增兵討讎懼戰士狐疑無以沮勸故抑廢王命以崇承制慕義者蒙榮待放者被戮此乃主人之利非游士之願也故僕鑒戒前人困窮死戰僕雖下愚亦嘗聞君子之言矣此實非吾心也乃主人招焉凡吾所以背棄國民用命此城者正以君子之違不適敵國故也是以獲罪主人見攻踰時而足下更引此義以為吾規無乃辭同趣異非吾子所為休戚者哉吾聞之也義不背親忠不違君故東宗本州以為親

援中扶郡將以安社稷一舉二得以徼忠孝何以為非

而足下欲使吾輕本破家均君主主人主人之於我也年

為吾兄分為篤友道垂告去以安君親可謂順矣若子

之言則包胥宜致命於伍員不當號哭於秦庭矣苟區

區於攘患不知言垂乎道理矣足下或者見城圍不解

救兵未至感婚姻之義惟平生之好以屈節而苟生勝

守義而傾覆也昔晏嬰不降志於白刃南史不曲筆以

求生故身著圖象名垂後世況僕據金城之固驅士民

之力散三年之畜以為一年之資匡困補乏以悅天下
何圖築室反耕哉但懼秋風揚塵伯珪馬首南向張楊
飛燕瞽力作難北鄙將告倒縣之急股肱奏乞歸之誠
耳主人當鑒我曹輩反旌退師治兵鄴垣何宜久辱盛
怒暴威於吾城下哉足下譏吾恃黑山以為救獨不念
黃巾之合從邪如飛燕之屬悉以受王命矣昔高祖取
彭越於鉅野光武創基兆於綠林卒能龍飛中興以成
帝業苟可輔主興化夫何嫌哉況僕親奉承璽書與之

從事行矣孔璋足下徼利於境外臧洪受命於君親吾
子託身於盟主臧洪策名於長安子謂余身死而名滅
僕亦笑子身死而無聞焉悲哉本同而末離努力努力
夫復何言紹見洪書知無降意增兵急攻城中糧盡外
無援救洪自度不免呼將吏謂曰袁紹無道所圖不軌
且不救洪郡將洪於大義不得不死諸君無事空與此
禍可先城未破將妻子出將吏皆垂泣曰明府與袁氏
本無怨隙今為本朝郡將之故自致殘困吏民何忍當

舍明府去也初尚掘鼠煮筋角後無所復食主簿啓內
厨米三斗請稍為饘粥洪曰何能獨甘此邪使為薄糜
徧班士衆又殺其愛妾以食兵將兵將咸流涕無能仰
視男女七八千人相枕而死莫有離叛者城陷生執洪
紹素親洪盛施帷幔大會諸將見洪謂曰臧洪何相負
若此今日服未洪據地瞑目曰諸袁事漢四世五公可
謂受恩今王室衰弱無扶翼之意欲因際會希冀非望
多殺忠良以立姦威洪親見呼張陳留為兄則洪府君

亦宜為弟同共勦力為國除害何為擁衆觀人屠滅惜
洪力劣不能推刃為天下報仇何謂服乎紹本意愛洪
意欲令屈服原之見洪辭切知終不為已用乃殺之洪
邑人陳容少為書生親慕洪隨洪為東郡丞城未敗洪
遣出紹令在坐見洪當死起謂紹曰將軍舉大事欲為
天下除暴而專先誅忠義豈合天意臧洪發舉為郡將
奈何殺之紹慙左右使人牽出謂曰汝非臧洪儔空復
爾為容顧曰夫仁義豈有常蹈之則君子背之則小人

今日寧與臧洪同日而死不與將軍同日而生復見殺
在紹坐者莫不歎息竊相謂曰如何一日殺二烈士先
是洪遣司馬二人出求救呂布比還城已陷皆赴敵死
張衡字平子南陽西鄂人也世為著姓祖父堪蜀郡太
守衡少善屬文游於三輔因入京師觀太學遂通五經
貫六藝雖才高於世而無驕尚之情也常從容淡靜不
好交接俗人永元中舉孝廉不行連辟公府不就時天
下承平日久自王侯以下莫不踰侈衡乃擬班固兩都

作二京賦因以諷諫精思傳會十年乃成文多不載大將軍鄧騭奇其才累召不應衡善機巧尤致思於天文陰陽歷算耽好玄經謂崔瑗曰吾觀太玄方知子雲妙極道數乃與五經相擬非徒傳記之屬使人難論陰陽之事漢家得天下二百歲之書也復二百歲殆將終乎所以作者之數必顯一世常然之符也漢四百年玄其興矣安帝雅聞衡善術學公車特徵拜郎中再遷太史令遂乃研覈陰陽妙盡璇璣之正作渾天儀著靈憲算

罔論言甚明順帝初再轉復為太史令衡不慕當世所
居之官輒積年不徙自去史職五載復還乃設客問作
應間以見其志云有問余者曰蓋聞前哲首務務於下
學上達佐國理民有云為也朝有所聞則夕行之立功
立事式昭德音是故伊尹思使君為堯舜而民處唐虞
彼豈虛言而已哉必旌厥素爾咎單巫咸實守王家申
伯樊仲實幹周邦服衮而朝介圭作瑞厥跡不朽垂烈
後昆不亦丕歟且學非以要利而富貴萃之貴以行令

富以施惠惠施令行故易稱以大業質以文美實由華
興器賴雕飾為好人以輿服為榮吾子性德體道篤信
安仁約已博藝無堅不鑽以思世路斯何遠矣曩滯日
官今又原之必也學非所用術有所仰故臨川將濟而
舟楫不存焉徒經思天衢內昭獨智固合理民之式也
故嘗見諉於鄙儒深厲淺揭隨時為義曾何貪於支離
而習其孤技邪參輪可使自轉木雕猶能獨飛已垂翅
而還故棲壺亦調其機而銛諸昔有文王自求多福人

生在勤不索何獲曷若卑體屈已美言以相尅鳴於喬
木乃金聲而玉振之用後勲雪前吝婞佷不柔以意誰
靳也應之曰是何觀同而見異也君子不患位之不尊
而患德之不崇不恥祿之不夥而恥智之不博是故藝
可學而行可力也天爵高縣得之在命或不速而自懷
或羨旃而不臻求之無益故智者面而不思貼身以徼
幸固貪夫之所為未得而豫喪也枉尺直尋議者譏之
盈欲虧志孰云非羞於心有猜則蓋殮饌舖猶不屑餐

旌替以之意之無疑則兼金盈百而不嫌辭孟軻以之
士或解短褐而襲黼黻或委鍾築而據文軒者度德拜
爵量績受祿也輸力致庸受必有階渾元初基靈軌未
紀吉凶分錯人用腫朦黃帝為斯深慘有風后者是焉
亮之察三辰於上跡禍福乎下經緯歷數然後天步有
常則風后之為也當少昊青陽之末實或亂德人神雜
擾不可方物重黎又相顛頊而申理之日月即次重黎
之為也人各有能因藝受任鳥師別名四叔三正官無

二業事不並濟晝長則宵短日南則景北天且不堪兼
況以人該之夫元龍迎夏則陵雲而奮鱗樂時也涉冬
則渥泥而潛蟠避害也公旦道行故制典禮以尹天下
懼教誨之不從有人之不理仲尼不遇故論六經以俟
來辟恥一物之不知有事之無範所考不齊如何可一
夫戰國交爭戎車競驅君若綴旒人無所麗燭武縣縋
而秦伯退師魯連係箭而聊城弛柝從往則合橫來則
離安危無常要在說夫咸以得人為臬失士為尤故樊

噲披帷入見高祖高祖踞洗以對酈生當此之會乃龜
鳴而鼈應也故能同心勦力勤恤人隱奄受區夏遂定
帝位皆謀臣之由也故一介之策各有攸建子長謀之
爛然有第夫女魃北而應龍翔洪鼎聲而軍容息滄暑
至而鶉火棲寒冰泆而龜鼈蟄今也皇澤宣洽海外混
同萬方億醜并質共濟若修成之不暇尚何功之可立
立事有三言為下列下列且不可庶矣奚冀其二哉於
茲縉紳如雲儒士成林及津者風摠失塗者幽僻遭遇

難要趨偶為幸世易俗異事勢舛殊不能通其變而一度以揆之斯契船而求劔守株而伺鬼也冒愧逞願必無仁以繼之有道者所不履也越王勾踐事此故厥緒不永捷徑邪至我不忍以投步干進苟容我不忍以歛肩雖有犀舟勁楫猶人涉印否有須者也姑亦奉順敦篤守以忠信得之不休不獲不吝不見是而不憚居下位而不憂允上德之常服焉方將師天老而友地典與之乎高睨而大談孔甲且不足慕焉稱殷彭及周聃與

世殊技固孤是求子憂朱泚曼之無所用吾恨輪扁之
無所教也子規木雕獨飛慙我垂翅故棲吾感去龜附
鵠悲爾先笑而後號也斐豹以斃督燔書禮至以掖國
作銘弦高以牛餽退敵墨翟以縈帶全城貫高以端辭
顯義蘇武以禿節效貞蒲旦以飛矰逞巧詹何以沈鈞
致精奕秋以碁局取譽王豹以清謳流聲僕進以不能
參名於二立退又不能羣比數子慙三墳之既頽惜八
索之不理庶前訓之可鑽聊朝隱乎柱史且韞積以待

價踵顏氏以行止曾不憚夫晉楚敢告誠於知已陽嘉
元年復造候風地動儀以精銅鑄成員徑八尺合蓋隆
起形似酒樽飾以篆文山龜鳥獸之形中有都柱傍行
八道施闕發機外有八龍首銜銅丸下有蟾蜍張口承
之其牙機巧制皆隱在尊中覆蓋周密無際如有地動
尊則振龍機發吐丸而蟾蜍銜之振聲激揚伺者因此
覺知雖一龍發機而七首不動尋其方面乃知震之所
在驗之以事合契若神自書典所記未之有也嘗一龍

機發而地不覺動京師學者咸怪其無驗後數日驛至
果地震隴西於是皆服其妙自此以後乃令史官記地
動所從方起時政事漸損權移於下衡因上疏陳事曰
伏惟陛下宣哲克明繼體承天中遭傾覆龍德泥蟠今
乘雲高躋磐桓天位誠所謂將隆大位必先倥偬之也
親履艱難者知下情備經險易者達物偽故能一貫萬
機靡所疑惑百揆允當庶績咸熙宜獲福祉神祇受譽
黎庶而陰陽未和災眚屢見神明幽遠宜鑒在茲福仁

禍淫景響而應因德降休乘失致咎天道雖遠吉凶可見近世鄭蔡江樊周廣王聖皆為效矣故恭儉畏忌必蒙祚祉奢淫諂慢鮮不夷戮前事不忘後事之師也夫情勝其性流遞忘反豈唯不肖中才皆然苟非大賢不能見得思義故積惡成釁罪不可解也向使能瞻前顧後援鏡自戒則何陷於凶患乎貴寵之臣衆所屬仰其有愆尤上下知之褒美譏惡有心皆同故怨讟溢乎四海神明降其禍辟也頃年雨常不足思求所失則洪範

所謂僭恒暘若者也懼羣臣奢侈昏踰典式自下逼上用速咎徵又前年京師地震土裂裂者威分震者人擾也君以靜唱臣以動和威自上出不趣於下禮之政也竊懼聖思厭倦制不專已思不忍割與衆共威威不可分德不可共洪範曰臣有作福作威玉食害於而家凶於而國天鑒孔明雖疎不失災異示人前後數矣而未見所革以復往悔自非聖人不能無過願陛下思惟所以稽古率舊勿令刑德八柄不由天子若思從上下事

依禮制禮制修則奢僭息事合宜則無凶咎然後神望
允塞灾消不至矣初光武善讖及顯宗肅宗因祖述焉
自中興之後儒者爭學圖緯兼復附以妖言衡以圖緯
虛妄非聖人之法乃上疏曰臣聞聖人明審律歷以定
吉凶重之以卜筮雜之以九宮經天驗道本盡於此或
觀星辰逆順寒燠所由或察龜策之占巫覡之言其所
因者非一術也立言於前有徵於後故智者貴焉謂之
讖書讖書始出蓋知之者寡自漢取秦用力兵戰功成

業遂可謂大事當此之時莫或稱讖若夏侯勝眭孟之徒以道術立名其所述著無讖一言劉向父子領校祕書閱定九流亦無讖錄成哀之後乃始聞之尚書堯使鯀理洪水九年績用不成鯀則殛死禹乃嗣興而春秋讖云共工理水凡讖皆云黃帝伐蚩尤而詩讖獨以為蚩尤敗然後堯受命春秋元命苞中有公輸班與墨翟事見戰國非春秋時也又言別有益州益州之置在於漢世其名三輔諸陵世數可知至於圖中訖於成帝一卷之

書互異數事聖人之言勢無若是殆必虛偽之徒以要世取資往者侍中賈逵摘識互異三十餘事諸言識者皆不能說至於王莽篡位漢世大禍八十篇何為不載則知圖讖成於哀平之世也且河洛六藝篇錄已定後人皮傳無所容篡永元中清河宋景遂以歷紀推言水災而偽稱洞視玉版或者至於棄家業入山林後皆無效而復采前世成事以為證驗至於永建復統則不能知此皆欺世罔俗以昧勢位情偽較然莫之糾禁且律

歷卦候九宮風角數有徵效世莫肯學而競稱不占之

書譬猶畫工惡圖犬馬而好作鬼魅誠以實事難形而
虛偽不窮也宜收藏圖讖一禁絕之則朱紫無所眩典
籍無瑕玷矣後遷侍中帝引在帷幄諷議左右嘗問衡
天下所疾惡者宦官懼其毀已皆共目之衡乃詭對而
出闈豎恐終為其患遂共讒之衡常思圖身之事以為
吉凶倚伏幽微難明乃作思立賦以宣寄情志其辭曰
仰先哲之立訓兮雖彌高而弗違匪仁里其焉宅兮匪

義迹其焉追潛服膺以永覲兮綿日月而不衰伊中情
之信修兮慕古人之貞節竦余身而順止兮遵繩墨而
不跌志團團以應懸兮誠心固其如結旌性行以制佩
兮佩夜光與瓊枝嚮幽蘭之秋華兮又綴之以江蘺既
姱麗而鮮雙兮非是時之攸珍奮余榮而莫見兮播余
香而莫聞幽獨守此仄陋兮敢怠皇而舍勤幸二八之
選虞兮喜傳說之生殷尚前良之遺風兮恫後辰而無
及何孤行之煢煢兮孑不羣而介立感鸞鷲之特棲兮

悲淑人之稀合彼無合其何傷兮患衆偽之冒真且獲
讙於羣弟兮啓金滕而乃信覽蒸民之多僻兮畏立辟
以危身曾煩毒以迷惑兮羌孰可與言已私湛憂而深
懷兮思續紛而不理願竭力以守義兮雖貧窮而不改
執雕虎而試象兮陷焦原而跟止庶斯奉以周旋兮要
既死而後已俗遷渝而事化兮泯規矩之園方珍蕭艾
於重筭兮謂蕙芷之不香斥西施而弗御兮羈要裊以
服箱行陂僻而獲志兮循法度而離殃惟天地之無窮

兮何遭遇之無常不抑操而苟容兮譬臨河而無航欲
巧笑以干媚兮非余心之所常襲溫恭之黻衣兮披禮
義之繡裳辯貞諒以為鞏兮雜技藝以為珩昭綵藻與
雕琢兮璜聲遠而彌長淹棲遲以恣欲兮耀靈忽其西
藏恃已知而華予兮鷓鴣鳴而不芳冀一年之三秀兮
道白露之為霜時疊疊而代序兮疇可與乎比伉咨妒
媿之難並兮想依韓以流亡恐漸冉而無成兮留則蔽
而不章心猶豫而狐疑兮即岐陟而攄情文君為我端

著兮利飛遁以保名歷衆山以周流兮翼迅風以揚聲
二女感於崇岳兮或冰折而不營天蓋高而為澤兮誰
云路之不平勗自彊而不息兮蹈玉階之嶢崢懼筮氏
之長短兮鑽東龜以觀禎遇九臯之介鳥兮怨素意之
不逞遊塵外而瞥天兮據冥翳而哀鳴鵬鷲競於貪婪
兮我修潔以益榮子有故於玄鳥兮歸母氏而後寧占
既吉而無悔兮簡元辰而俶裝旦余沐於清源兮晞余
髮於朝陽漱飛泉之漑液兮咀石菌之流英翺鳥舉而

魚躍兮將往走乎八荒過少皞之窮野兮問三丘乎句
芒何道真之淳粹兮去穢累而粟輕登蓬萊而容與兮
鼇雖抃而不傾留瀛洲而採芝兮聊且以乎長生憑歸
雲而遐逝兮夕余宿乎扶桑喻青岑之玉醴兮餐沆瀣
以為糧發昔夢於木禾兮穀崑崙之高岡朝吾行於暘
谷兮從伯禹於稽山集羣臣之執玉兮疾防風之食言
指長沙以邪徑兮存重華乎南鄰哀二妃之未從兮翩
擯處彼湘瀕流日眺夫衡阿兮覩有黎之圮墳痛火正

之無懷兮託山陂以孤魂愁蔚蔚以慕遠兮越卬州而
愉教躋日中於昆吾兮憇炎天之所陶揚芒燥而絳天
兮水泫泫而涌濤溫風翕其增熱兮怒鬱邑其難聊顛
羈旅而無友兮余安能乎留茲顧金天而歎息兮吾欲
往乎西嬉前祝融使舉麾兮纚朱鳥以承旗躔建木於
廣都兮拓若華而躊躇超軒轅於西海兮跨汪氏之龍
魚聞此國之千歲兮曾焉足以娛余思九土之殊風兮
從蓐收而遂徂歟神化而蟬蛻兮朋精粹而為徒蹶白

門而東馳兮云台行乎中野
亂弱水之潺湲兮逗華陰
之湍渚號馮夷俾清津兮擢
龍舟以濟予會帝軒之未
歸兮悵相佯而延佇
泗河林之蓁蓁兮偉闕睢之
戒女黃靈詹而訪命兮摻
天道其焉如曰近信而遠
疑兮六籍闕而不書
神遠昧其難覆兮疇克謨
而從諸牛哀病而成虎兮
雖逢昆其必噬斃令殪而
尸亡兮取蜀禪而引世
死生錯而不齊兮雖司命
其不斲竇號行於代路
兮後膺祚而繁廡王肆侈
於漢庭兮卒銜恤而絕緒
尉

龐眉而郎潛兮逮三葉而邁武董弱冠而司袞兮設王
隧而弗取夫吉凶之相仍兮恒反側而靡所穆負天以
悅牛兮豎亂叔而幽主文斷袪而忌伯兮閣謁賊而寧
后通人闇於好惡兮豈愛惑之能剖羸植讖而成胡兮
備諸外而發內或輦賄而違車兮孕行產而為對慎竈
顯於言天兮占水火而妄評梁叟患夫黎丘兮丁厥子
而事乃親所睇而弗識兮矧幽冥之可信無綿孳以滓
已兮思百憂以自疚彼天鑒之孔明兮用斐忱而佑仁

湯蠲體以禱祈兮蒙龐褫以振人景三摠以營國兮熒
惑次於他辰魏顥亮以從理兮鬼亢回以敝秦咎陶邁
而種德兮德樹茂乎英六桑末寄夫根生兮卉既雕而
已毓有無言而不讎兮又何往而不復盍遠迹以飛聲
兮孰謂時之可蓄仰矯首以遙望兮魂愀惘而無疇偪
區中之隘陋兮將北度而宣遊行積冰之磴磴兮清泉
汨而不流寒風淒而永至今兮拂穹岫之騷騷玄武縮於
殼中兮騰蛇蜿而自糾魚矜鱗而并凌兮鳥登木而失

條坐太陰之屏室兮慨含欵而增愁怨高陽之相寓兮
徇顛頊之宅幽庸織絡於四商兮斯與彼其何瘳望寒
門之絕垠兮縱余縲乎不周迅飈瀟其騰我兮鶩翩飄
而不禁趨谿啁之洞穴兮標通淵之砾砾經重陰乎寂
寞兮愍墳羊之潛深追慌忽於地底兮軼無形而上浮
出右密之閤野兮不識蹊之所由速燭龍令執炬兮過
鍾山而中休瞰瑤谿之赤岸兮吊祖江之見劉聘王母
於銀臺兮羞玉芝以療饑戴勝愍其既歎兮又謂余之

行遲載太華之玉女兮召洛浦之宓妃咸姣麗以盡媚
兮增嫵眼而娥眉舒妙婧之纖腰兮揚雜錯之桂徽離
朱脣而微笑兮顏的礪以遺光獻環珉與璵璠兮申厥
好以玄黃雖色豔而賂美兮志浩盪而不嘉雙材悲於
不納兮並詠詩而清歌歌曰天地烟煴百卉含葩鳴鶴
交頸睢鳩相和處子懷春精魂回移如何淑明忘我實
多將答賦而不暇兮爰整駕而亟行瞻崑崙之巍巍兮
臨紫河之洋洋伏靈龜以負坻兮亘螭龍之飛梁登閭

風之曾城兮構不死而為牀屑瑤藥以為糗兮斟白水
以為漿抨巫咸以占夢兮迺貞吉之元符滋令德於正
中兮含嘉秀以為敷既垂穎而顧本兮爾要思乎故居
安和靜而隨時兮姑純懿之所廬戒庶僚以夙會兮僉
恭職而並迓豐隆軒其震霆兮列缺暎其照夜雲師譔
以交集兮凍雨沛其灑塗轆瑁輿而樹葩兮擾應龍以
服輅百神森其備從兮屯騎羅而星布振余袂而就車
兮修劔揭以低昂冠罟罟其映蓋兮佩緜纚以輝煌僕

夫儼其正策兮八乘攬而超驤氛旄溶以天旋兮蜺旌
飄而飛揚撫輅軹而還睨兮心灼藥其如湯羨上都之
赫戲兮何迷故而不忘左青瑠以捷芝兮右素威以司
鉦前長離使拂羽兮委水衡乎玄冥屬箕伯以函風兮
激澠忍而為清曳雲旗之離離兮鳴玉鸞之詿詿涉青
霄而升遐兮浮蔑蒙而上征紛翼翼以徐戾兮焱回回
其揚靈叫帝閭使闢扉兮覲天皇於瓊宮聆廣樂之九
奏兮展洩洩以彤彤考理亂於律鈞兮意建始而思終

惟盤逸之無數兮懼樂往而哀來素撫弦而餘音兮大
容吟曰念哉既防溢而靜志兮迨我暇以翱翔出紫宮
之肅肅兮集太微之閭闈命王良掌策駟兮踰高閣之
鏘鏘建固車之幕幕兮獵青林之芒芒彎威弧之撥刺
兮射嶠冢之封狼觀壁壘於北落兮伐河鼓之磅礴乘
天潢之汎汎兮浮雲漢之湯湯倚招搖攝提以低回剡
流兮察二紀五緯之綢繆適皇偃蹇天矯媯以連卷兮
雜沓叢穎颯以方驤馘汨颺戾沛以罔象兮爛漫麗靡

貌以迭邊凌驚雷之硠礚兮弄狂電之淫裔踰厖瀕於
宕冥兮貫倒景而高厲廓盪盪其無涯兮乃今窮乎天
外據開陽而頻盼兮臨舊鄉之暗藹悲離居之勞心兮
情惛惛而思歸魂眷眷而屢顧兮馬倚輶而徘徊雖遨
遊以愉樂兮豈愁慕之可懷出閭闔兮降天塗乘飈忽
兮馳虛無雲霏霏兮繞余輪風眇眇兮振余旗續聯翩
兮紛暗曖倏眩眩兮反常閭收疇昔之逸豫兮卷淫放
之遐心修初服之娑娑兮長余佩之參參文章煥以粲

爛兮美紛紜以從風御六藝之珍駕兮游道德之平林
結典籍而為畧兮歐儒墨而為禽玩陰陽之變化兮詠
雅頌之徽音嘉曾氏之歸耕兮慕歷陵之欽奎共夙昔
而不貳兮固終始之所服也夕惕若厲以省讐兮懼余
身之未勅也苟中情之端直兮莫吾知而不慙墨無為
以疑志兮與仁義乎消搖不出戶而知天下兮何必歷
遠以劬勞系曰天長地久歲不留俟河之清祇懷憂願
得遠度以自娛上下無常窮六區超踰騰躍絕世俗飄

飄神舉逞所欲天不可階仙夫希栢舟悄悄吝不飛松
喬高跼孰能離結精遠遊使心攜回志竭來從玄謀獲
我所求夫何思永和初出為河間相時國王驕奢不遵
典憲又多豪右共為不軌衡下車治威嚴整法度陰知
姦黨名姓一時收禽上下肅然稱為政理事視三年上
書乞骸骨徵拜尚書年六十二永和四年卒著周官訓
詁崔瑗以為不能有異於諸儒也又欲繼孔子易說彖
象殘缺者竟不能就所著詩賦銘七言靈憲應問七辯

巡誥縣圖凡三十二篇永初中謁者僕射劉珍校書郎
劉駒駭等著作東觀撰集漢記因定漢家禮儀上言請
衡參論其事會並卒而衡嘗歎息欲終成之及為侍中
上疏請得專事東觀收檢遺文畢力補綴又條上司馬
遷班固所叙與典籍不合者十餘事又以為王莽本傳
但應載篡事而已至於編年月紀災祥宜為元后本紀
又更始居位人無異望光武初為其將然後即真宜以
更始之號建於光武之初書數十上竟不聽及後之著

述多不詳典時人追恨之

馬融字季長扶風茂陵人也將作大匠嚴之子為人美辭貌有俊才初京兆摯恂以儒術教授隱於南山不應徵聘名重關西融從其游學博通經籍恂竒融才以女妻之永初二年大將軍鄧騭聞融名召為舍人非其好也遂不應命客於涼州武都漢陽界中會羌虜颺起邊方擾亂米穀踴貴自關以西道殣相望融既饑困乃悔而歎息謂其友人曰古人有言左手據天下之圖右手

刳其喉愚夫不為所以然者生貴於天下也今以曲俗
咫尺之羞滅無貴之軀殆非老莊所謂也故往應騰召
四年拜為校書郎中詣東觀典校祕書是時鄧太后臨
朝騰兄弟輔政而俗儒世士以為文德可興武功宜廢
遂寢蒐狩之禮息戰陣之法故猾賊從橫乘此無備融
乃感激以為文武之道聖賢不墜五才之用無或可廢
元初二年上廣成頌以諷諫其辭曰臣聞孔子曰奢則
不遜儉則固奢儉之中以禮為界是以蟋蟀山樞之人

並刺國君諷以太康馳驅之節夫樂而不荒憂而不困
先王所以平和府藏頤養精神致之無疆故憂擊鳴球
載於虞謨吉日車攻序於周詩聖主賢君以增盛美豈
徒為奢淫而已哉伏見元年以來遭值厄運陛下戒懼
災異躬自菲薄荒棄禁苑廢弛樂懸勤憂潛思十有餘
年以過禮數重以皇太后體唐虞親九族篤睦之德陛
下履有虞蒸蒸之孝外舍諸家每有憂疾聖恩普勞遣
使交錯稀有曠絕時或寧息又無以自娛樂殆非所以

逢迎太和裨助萬福也臣愚以為雖尚頗有蝗蟲今年

五月以來雨露時澍祥應方至方涉冬節農事間隙宜

幸廣成覽原隰觀宿麥收藏因講武校獵使僚庶百姓

復覩羽旄之美聞鐘鼓之音歡嬉喜樂鼓舞疆畔以迎

和氣招致休慶小臣螻蟻不勝區區職在書籍謹依舊

文重述蒐狩之義作頌一篇并封上淺漏鄙薄不足觀

省臣聞昔命師於鞬櫜偃伯於靈臺或人嘉而稱焉彼

固未識夫雷霆之為天常金革之作昏明也自炎黃之

前傳道罔記三五以來越可畧聞且區區之艷郊猶廓
七十里之囿盛春秋之苗詩詠囿草樂奏騶虞是以大
漢之初基也宅茲天邑總風雨之會交陰陽之和揆厥
靈囿榮於南郊徒觀其坳場區宇恢胎曠蕩蘋蘆勿罔
寒豁鬱泱騁望千里天與地莽於是周陸環瀆右轡三
塗左概嵩嶽面據衡陰箕背王屋浸以波滢夤以榮洛
金山石林殷起乎其中峨峨磴磴鏘鏘唯唯隆穹槃回
嵒峩錯崔神泉側出丹山湮池怪石浮罄耀焜於其陂

其土毛則摧牧薦草芳茹甘荼此其芸菹昌本深蒲芝
蒿葶苴藁荷芋渠桂荏鳧葵格萑蒞于其植物則立林
包竹藩陵蔽京珍林嘉樹建木叢生椿梧栝栢柅柳楓
楊豐彤對蔚峯頡摻爽翕習春風含津吐榮鋪於布濩
雌扈薶熒惡可殫形至於陽月陰慝害作百草畢落林
衡成田焚菜柞木然後舉天綱頓八絃擘斂九藪之動
物纒橐四野之飛征鳩之乎茲囿之中山敦雲移羣鳴
膠膠鄙駭譟謹子野聽聳離朱目眩隸首策亂陳子籌

昏於時營圍恢廓充斥川谷罽罃羅羅彌綸阮澤臯宰
陵山校隊案部前後有屯甲乙相伍戊己為堅乘輿乃
以吉月之陽朔登於疏鏤之金路六驕駭之玄龍建雄
虹之旌夏揭鳴鳶之修幢曳長庚之飛鬣載日月之太
常棲招搖與玄弋注枉矢於天狼羽毛紛其彰馳揚金
爰而拖玉瓊屯田車於平原播同徒於高岡旃旒摻其
如林錯五色以擣光清氛埃掃野場誓六師搜雋良司
徒勒卒司馬平行車攻馬同教達戒通伐咎鼓撞華鐘

獵徒縱赴榛叢，徽嫗霍奕，別鷲分奔。騷擾聿皇，往來交
舛，紛紛回回，南北東西，風行雲轉。匈磁隱匈，黃塵勃滯，
閭若霧昏，日月為之籠光，列宿為之翳昧。僂狡課才，勁
勇程氣，狗馬角逐，膺鷗競鷙，驍騎旁佐，輕車橫厲，相與
陸梁。聿皇於中原，絹猓踧踖，銳特肩胛，完羝撝介，鮮散毛
族，枯羽羣然，後飛鋌電，激流矢雨，墜各指所質，不期俱
殪。竄伏，扔輪發作，梧轄殺及，狂擊頭陷，顱碎獸不得，殽
禽不得，替或夷由，未殊顛狽，頓躓，螻蟬，充衢寒隧。

葩華滂布不可勝計若夫鷲獸殺蟲倨牙黔口大匈哨
後緼巡毆紆負隅依阻莫敢嬰禦乃使鄭叔晉婦之徒
睽孤剗刺裸裎袒裼冒楸柘槎棘枳窮浚谷底幽嶰暴
斤虎搏狂兇獄齧熊祛封豨或輕詵越悍度䟽婁領犯
歷嵩巒陵喬松履修橈踔躡枝杪標端尾蒼雌倚玄援
木產盡寓屬單罕罔合部罾弋同曲類行並驅星布麗
屬曹伍相保各有分局矰落飛流織羅絡縵遊雉羣驚
晨鳧輩作翬然雲起霄爾電落爾乃蘋觀高蹈改乘回

轅汴恢方撫馮夷策句芒超荒忽出重陽厲雲漢橫天

潢導鬼區徑神場詔靈保召方相驅厲疫走蜮祥捐罔

兩拂游光枷天狗縹墳羊然後緩節舒容裴回安步降

集波蘩川衡澤虞矢魚陳畧茲飛宿沙田開古壘音暈

終葵揚關斧刊重冰撥蟄戶測潛鱗踵介旅逆獵湍瀨

濟薄汾撓淪滅潭淵左挈夔龍右提蛟鼉春獻王鮪夏

薦鼈鼉於是流覽徧照殫變極態上下究竟山谷蕭條

原野嶮嶮上無飛鳥下無走獸虞人植矜獵者効具車

弊田罷旋入禁園棲遲乎昭明之觀休息乎高光之榭
以臨乎宏池鎮以瑤臺純以金堤樹以蒲柳被以綠莎
瀆漾沆漭錯紜槃委天地虹洞固無端涯大明生東月
滅西陂乃命壺涿驅水蠱逐罔螭滅短狐籍鯨鯢然後
方餘皇連舳舟張雲帆施蜺幃靡颺風陵迅流發櫂歌
縱水謳淫魚出蒼菼浮湘靈下漢女游水禽鴻鵠鴛鴦
鷗鷺鶴鵠鷓鴣鷺鴈鷺鷥乃安斯寢戢翮其涯魴鱖鱣鱣
編鯉鯉鱈魴樂我純德騰踊相隨雖靈沼之白鳥孟津

之躍魚方斯茂矣然猶詠歌於伶簫載陳於方策豈不
哀哉於是宗廟既享庖厨既充車徒既簡器械既攻然
後擺牲班禽淤賜犒功羣師疊伍伯校千重山壘常滿
房俎無空酒正案隊膳夫巡行清醪車湊燔炙騎將鼓
駭舉爵鍾鳴既觴若乃陽阿哀裴之晉制闡鼉華羽之
南音所以洞蕩匈臆發明耳目疏越蘊蓄駭洞底伏鎗
鎗鎗鎗奏於農郊大路之衢與百姓樂之是以明德耀
乎中夏威靈暢乎四荒東鄰浮巨海而入享西旅越葱

嶺而來王南徼因九譯而致貢朔狄屬象胥而來同蓋
安不忘危治不忘亂道在乎茲斯固帝王之所以曜神
武而折遐衝者也方今大漢收功於道德之林致平於
仁義之淵忽蒐狩之禮闕槃虞之佃闇昧不睹日月之
光聾昏不聞雷霆之震於今十二年為日久矣方將刊
禁臺之祕藏發天府之官常由質要之故業率典刑之
舊章采清原嘉岐陽登俊傑命賢良舉淹滯拔幽荒察
淫侈之華譽顧介特之實功聘猷畝之羣雅宗重淵之

潛龍乃儲精山藪歷思河澤日曬鼎俎耳聽康衢營傳
說於胥靡求伊尹於庖厨索膠鬲於魚鹽聽甯戚於牛
車俾之昌言而宏議軼越三家馳騁五帝悉覽休祥總
括羣瑞遂棲鳳凰於高梧宿麒麟於西園納焦僥之珍
羽受王母之白環永逍遙乎宇宙與二儀乎無彊貳造
化於厚土參神施於昊乾超特達而無儔煥巍巍而無
原豐千億之子孫歷萬載而永延禮樂既闕北轅反旆
至自新城背伊闕反洛京頌奏忤鄧氏滯於東觀十年

不得調因兄子喪自劾歸太后聞之恚謂融羞薄詔除
欲仕州郡遂令禁錮之太后崩安帝親政召還郎署復
在講部出為河間王廐長史延光三年車駕東巡岱宗
融上東巡頌帝竒其文召拜郎中及北鄉侯即位融移
病去為郡功曹陽嘉二年詔舉敦樸城門校尉岑起舉
融徵詣公車對策拜議郎大將軍梁商表為從事中郎
轉武都太守時西羌反叛征西將軍馬賢與護羌校尉
胡疇征之而稽久不進融知其將敗上書乞自劾曰今

雜種諸羌轉相鈔盜宜及其未并亟遣深入破其支黨
而馬賢等處處留滯羌胡百里望塵千里聽聲今逃匿
避回漏出其後則必侵寇三輔為民大害臣願請賢所
不可用關東兵五千裁假部隊之號盡力率勵埋根行
首以先吏士三旬之中必克破之臣少習學執不更武
職猥陳此言必受誣罔之辜昔毛遂廝養為衆所唾終
以一言克定從要臣懼賢等專守一城言攻於西而羌
出於東且其將士必有高克潰叛之變朝廷不能用又

陳星孛參畢參西方之宿畢為邊兵至於分野并州是也西戎北狄殆將起乎宜備二方尋而隴西羌反烏桓寇上郡皆卒如融言三遷桓帝時為南郡太守先是融有事忤大將軍梁冀旨冀諷有司奏融在郡貪濁免官髡徙朔方自刺不死得赦還復拜議郎重在東觀著述以病去官融才高博洽為世通儒教養諸生常有千數涿郡盧植北海鄭玄皆其徒也善鼓琴好吹笛達生任俠不拘儒者之節居宇器服多存侈飾常坐高堂施絳

紗帳前授生徒後列女樂弟子以次相傳鮮有入其室者嘗欲訓左氏春秋及見賈逵鄭衆注乃曰賈君精而不博鄭君博而不精既精既博吾何加焉但著三傳異同說注孝經論語詩易三禮尚書列女傳老子淮南子離騷所著賦頌碑誄書記表奏七言琴歌對策遺令凡二十一篇初融懲於鄧氏不敢復違忤勢家遂為梁冀草奏李固又作大將軍西第頌以此頗為正直所羞年八十八延熹九年卒於家遺令薄葬族孫日磾獻帝時

位至太傅

通志卷一百一十一上



總校官庶吉士臣侍朝

校對官助教臣吳省蘭

謄錄監生臣李維裕